

不度其身也然度我即度衆生度衆生即度我論語曰克己復禮天下歸仁此春秋公法家所以開大同之派也
美哉美哉日報之功其度衆生之本哉吾見十年之後生聚教誨民權固結仁學輸貫天地昭蘇聖道昌明即以
有湘人士爲日本薩摩之邦幾何起點之原可也若夫閱報之諸等利益海內諸君子哀哀長鳴悉數之頗嫌瑣
贅故特志其有關全局者於此

補錄撫憲告示

頭品頂戴兵部侍郎兼都察院右副御史巡撫湖南等處地方提督軍務兼理糧餉陳 爲懲前毖後勸辦塘
堰積穀事宜剴切曉諭事照得本省上年旱荒爲數十年所未有天災流行亦因人心不平乖氣致戾有此非常
之變惟自膏澤既降之後兼旬不雨便覺乾枯屢歲豐稔之餘一穀歉收便憂空乏不獨今歲爲然近十餘年以
來大概如斯推原其故一由於各處農田不似前治塘堰無以備旱一由於各屬城鄉不認真講求積穀無可救
荒此次既艱苦備嘗豈可不急爲將來之計秋收之後有田之家與佃耕之戶務須視同一體將其處應創應修
塘堰互相設法與辦其田主佃戶出賃出力自有各處向章力偶不及則彼此暫爲通融下年再爲歸結目前雖
費財力而從此常獲豐收所入何有止境至今年收成若幸豐稔地方積穀尤宜及時舉行合衆人之力量少成
多不必富有餘貨俱可量力捐助捐穀一斗譬如少取十升亦屬無損生計若有好義之家捐助較多合銀壹千
兩以上即當照例 奏請建坊次亦可由官給予匾額本年捐不足數尙可推至下年以豐年之有餘備歉歲
之不足但能安立規制經理得人目前無損後有大益是塘堰積穀兩事無論貧富俱應及早勉行合亟出示曉
諭爲此示仰閩省士民人等一體知悉爾等須知本年因去秋旱歉災重之區多煮草根樹皮荷延性命災輕各
處穀少價昂亦復勞力耗財若非仰沐我 皇上恩准撥款辦捐及各省協濟鉅款發交印委各員率同紳士
分別振撫平糶貧民固不能自保富室亦豈得獨安安危之機只爭呼吸當此創鉅痛深之後苟於備早備荒兩
端尙不亟圖補救他時若有緩急更將何以爲謀本部院到任後經營振撫實已心力交疲既經備歷艱難豈得
不爲吾民計及久遠人無遠慮必有近憂特此剴切曉諭各宜慎遵毋貽後悔特示等因除刊就告示通飭張貼
並將貼過地名具報外合就札飭札到仰該 即便遵照辦理毋得視為具文致令旱荒之年無從措手貽誤地
方問心何以自解如能實心實力辦有成效既爲民造無窮之福即於己垂不朽之功有意民事者尙其勉之毋
忽切切此札

北洋籌備礮彈摺奏

北洋大臣直隸總督臣王文韶跪 奏爲快礮子彈現在無多請 旨豫籌購辦以備緩急要需恭摺密陳仰
祈 聖鑒事竊查新建陸軍武毅軍等領操快砲及械庫存儲共一百四十六尊購自光緒二十年隨砲子彈
六萬二千九百餘顆除各營領用外現在所存無多深虞不繼前據天津軍械局詳請籌款添購當經咨請督辦
軍務處核辦嗣轉咨戶部核覆以快砲子彈存儲無多請撥的款添購自係爲籌備軍實起見惟價值需款甚
鉅實無此大宗的款足供指撥應令轉飭軍械局即就現存子彈勉供各營操演之用暫緩向洋廠添購仍嚴飭
機器製造各局趕緊設法仿造豫備緩急應用等因自應遵照辦理惟查格魯森五十七密里快砲所用子彈與
尋常後膛砲子彈不同必須無烟火藥其容藥銅殼身長七寸九分圓徑將及六寸重一斤四兩非極純極淨響
銅不克造成該兩局均無此項機器難以仿造即便添辦尙須度地建廠安設考較非急切所能奏功而建廠購
器尤非數十萬金所能集事此項子彈截至本年十月尙存二萬二千餘顆十一月間又撥武毅軍軍備戰一萬
三千六百顆現在僅存八千七百餘顆以營領存快砲一百六十餘尊計算每砲一尊僅存彈五十餘顆實屬
砲多彈少設遇有事立形匱乏又查軍械局尙有格魯森四十七密里快砲六尊原購子彈均已用罄又那登飛
四十七密里過山快砲十六尊每砲僅存子彈三百餘顆亦應一并添購統計五十七密里快砲壹百六十四尊
每砲至少須添購子彈三百七十顆四十七密里及四十二密里快砲共二十二尊每砲至少須添購子彈五百
顆共擬添購子彈七萬一千六百八十顆業經咨請督臣軍務處核示在案以上所擬添購子彈約需價值運脚
保險等項銀六七十萬兩部庫竭蹶誠所共知惟快砲爲行軍利器既費鉅款購得此砲設子彈不能接濟與無
砲同部議飭由機器製造各局設法仿造無如津局現有機器不能造此種子彈且無烟藥津局現雖能造亦只
能造槍藥不能造砲藥緣仿造砲藥另有一種機器也購求外洋軍火其委曲繁重如此臣因漢納根徑購各項
槍砲奉文交存津局萬一猝有要需竟致有砲無彈臣實不敢當此重咎爲此據實陳明請 旨勅下督辦軍
務處戶部撥爲籌畫以備不虞事關軍儲虛實理合恭摺具 奏伏乞 皇上聖鑒訓示謹 奏奉硃批
戶部議奏欽此

請辦粵漢鐵路稟稿○鄂湘粵三省紳商等 爲公懇 奏請趕築漢粵鐵路通力合作以杜外謀而保
利權事竊聞漢鐵路開辦之初曾蒙 奏明北幹路工竣後再由漢接展至粵爲南幹路其間經由之地或

湖南或江西尚未指明地段是原議專注北幹固明於本末先後輕重緩急之分惟近來強鄰日逼時事日非其情形與昔不同則辦法自當稍異非徒南幹鐵路宜一時並舉而經由之地且必須順道於湖南者中國幅員廣遠南北相距萬里恃大海以通聲氣今海軍既無力能與設有外變消息中斷隔若異域呼應不靈必內地造有鐵路方可連為一氣廣東財賦之區中日之役數百萬軍餉一朝而集南方有此要害未可失也此南幹鐵路之所宜速修也初議由漢至粵本擬繞道江西然準其地望如行於弦之上較湖南為迂遠今廣西鐵路已在龍州發端設有人欲求由此接展入湖南境內直抵漢口以拊我之背則我所造江西至粵之鐵路利權盡為彼所分奪矣况西貢較香港尤近西南洋公司船之貨物羣趨便捷必不肯舍近而泊遠其理至明如定計道出湖南則廣西鐵路即成亦只能為我路之支路也此鐵路之所宜道出湖南也近者湘人講求時務風氣漸新電線之設毫無阻礙又恐他人先我而辦鐵路切膚之痛患在腹心皆願合羣與辦以通為塞絕其覬覦尤可幸者湘中礦產富饒運道一通銷場極暢而由鄂湘達粵中無大河之隔自郴州踰驢田嶺復有前廣東布政使王藩司之春所修山路甚為平坦因而用之工程較省比之蘆漢利益更厚從前議辦鐵路時粵商自謂能多集股分然皆願入南幹而不願入北幹者以其重利所在也茲有此舉巨費可籌三省人士往返函商意見均合亟欲和眾豐財財期並舉擬呈請 俯賜電 奏並咨明 總署先行立案倘蒙 俞允再由紳等妥議勘路招股購地用人一切辦法章程另摺稟請 察核與辦以觀厥成紳等深維世變日切焦憂究其利害之所在實貴先發而制人蓋脈絡貫通邪氣自去有南幹則北幹益趨有成謀則外謀自沮大局安危所關非淺理合具呈為此公懇大人迅賜核准 奏咨立案施行實為德便謹呈

沅州府知府連培基擴修沅水校經堂稟稿

敬稟者竊國於天地必有與立強弱之形視乎人才之興成於學校近二十年來 國家於都中設同文院章程併課天算格致等學奉 旨允准又刑部侍郎李翰林院侍講學士秦先後 奏請推廣學校整頓書院課程預備人才均奉准 部議通行各省遵辦在案湖南湘鄉士紳擬定東山精舍學規章程稟奉 憲台撫部院批飭迅即舉辦以收興學育才之效仰見各上憲作興鼓舞陶冶羣材擅中外之勢圖富強之基莫不於庠序學校兢兢致意沅水校經書院自創建以來籌款勸捐折挫頻仍卑府到任於一切出入款項勤加清理凡

遇浮費力求撙節莫漸擴充以宏教育查得朱前守任內置買鄧運均○○○○○數處田產雖經立契因欠價未清產亦虛懸卑府先後備找價銀六百串易佃收租又芷江陳氏續捐田二十畝係盛盛業亦經找貼錢五十八串作為買業歸入書院現在歲例入數每年約增穀百餘石二十一二十二兩年彙取各款計共餘錢○千○百串據麻陽縣陳令稟稱三縣肄業生住齋名額惟麻陽獨少擬請於該縣齋額舊章四名外酌增一名以示均平等情卑府查書院款項既有贏餘該縣士子近皆有志向學未便沮其上進致令向隅業經批准並於章程中載明惟書院講堂規模卑隘齋舍亦不敷居住卑府因以兩年歲入餘款改修舊日講堂木瓦等料移作廚舍復買民間隙地添建齋房共二十四間於上年十二月督工修理晝夜經營莫或違處講堂現已落成齋舍工程約須兩月即可竣事查原定課程以經學史學理學算學時務詞章六科分門 卑府恭酌時勢變通課程以為原議六科可併者一可裁者一應添設而懸一格以待者亦各有其一夫經者道學之本源人事之極則凡天地之大名物之繁微顯並包洪纖具故言理學者不能離經經者理所從出也舍理以說經則經義晦離經以言理則理境虛不以理為專門而一附於經斯談經不至穿鑿支離而言理不入禪悟空寂此其可併者一也文藝之在中國原屬末務論語曰行有餘力則以學文又曰游於藝古之教子弟以及成人其先後本末瞭然易見顧所謂文藝者尚非今之詞章自唐宋迄今以帖括詩賦取士中國父兄所教與子弟所學皆溺於文而泰西各國執禮信汎愛之一偏以為教推格物致知之極功以為學智作巧述反得挾其藝以傲我中學之不振亦詞章階之厲爾今必謂文以載道不可偏廢經學史學何一非詞章所成若設為專科希縱楊馬以雕琢藻繪為工學步李杜以七字五言為事既於實學無裨且違 朝廷近日振拔人才之意此其可裁者一也伏查侍講學士秦原奏整頓書院課程本胡安定經義治事之意分類為六曰經學經說講義訓詁附焉曰史學時務附焉曰掌故之學洋務條約附焉曰輿地之學測量繪圖附焉曰算學格致製造附焉曰譯學各國語言文字附焉此六類者實於中西各學校為該貫讀史學當通中外古今得失之故原奏故附以時務算學當明格致製造之源其用乃該夫西學掌故以 本朝會典律例為大宗宜兼知各國條約始能折衝樽俎有神時用是時務不附諸史學而舉以標目實可以包括掌故惟輿地之學在當世尤為急務大地九萬里環球五大洲其疆域沿革山川險要物產土宜刻難殫究非挾專力以赴之不克周知沅湘為滇黔門戶宅阻蟠深地大物博測量繪圖礦務化學皆可即輿地以次考究亟宜添設專門以精其業至譯學宜習各國語言文字編譯西書考較得失初學之

門亦著述之林第海疆郡邑商販輻輳通事傳言學之較易沅西僻處恐難驟期且風氣初開師承絕少此所謂應添設而懸一格以待者亦各有其一也今謹酌照部咨原奏之類易書院先年所定之六科日經學史學算學掌故之學輿地之學譯學分爲六類著之課程俾學者日月就將力求實是庶於憲台廣學造士窮變久通之意不相刺謬是否有當伏惟裁奪

撫部院陳批
據該府稟稱節沅水校經書院經費漸形擴充除分別貼買田畝給價收租歲增穀一百餘石錢一千串有奇改修講堂添補齋舍酌增廡陽縣肄業生名額擬改堂院原議課程緣由奉批據稟籌增經費添設講堂齋舍及廡陽名額均屬妥協至擬改課程以經學包舉理學去詞章而酌增輿地所見亦極切實俱可照行譯學既關交涉尤爲通知四國之故所造端故京師首設方言館以爲之倡現在省城亦經開設務即延訪諳熟各國語言文字之人以資教習勿僅懸格以待餘俱如稟辦理仰布政司轉飭遵照儘聯容俟續發仍候

督部堂批示此繳等因奉此並據該府稟司合就札行札到該府即便遵照此札
提督學院江批

據稟沅水校經書院經該府到任清理樽節擴歲租添齋舍又於原課經史理算詞章時務六門斟酌裁改定爲經學史學算學掌故學輿地譯學六門上規朝制下順輿情其併理於經該時務於掌故裁詞章增輿地譯學識力尤爲明卓具見賢太守宏育英才克勤職守之苦心值此時事多艱交涉日棘亟需通權達變折衝禦武之才凡我臣子自以建學興賢爲第一義若得各府州縣盡如賢太守之罔辭勞怨共濟艱難圭璋髦士以匡時局庶有多乎所有沅水校經書院改訂章程詳覽再三無任欽遲實與本院鼓舞膠庠之隱念深相符合仍候

督部堂批示遵行可也繳稟存
俄人屯煤○旅順一口俄人已顯然踞爲屯煤之所在船塢之側支蓋廠鑿爲堆積地步一月前已積有煤四千墩輪船名潮州府者又滿載而往俄人用心亦可知矣
輪船開辦○去年湘鄂兩省紳商議立輪船公司載貨搭客已蒙香帥右帥批准在案現在鄂省專歸黃觀察嗣東一人督辦湘省專歸張太守祖同一人督辦各集股分五萬兩漢口岳州長沙湘潭碼頭均已購定地基暫借鄂之楚功楚寶湘之湘帆慈航四支官輪定期三月開辦駛行

捐助南學會書籍題名

譚觀察嗣同捐入

物名	每	實	價值	比較
御纂七經	十八函	律音彙攷	四本	儀禮圖 一函
同治上江兩縣志	十二本	文廟雜譜	一本	安吳四種 十六本
明季稗史	二函	漢學商兌	四本	王右丞集 二函
餘冬叙錄	十三本	拙尊園叢稿	二本	讀書叢錄 八本
三禮圖	一函	歷代帝王年表	四本	詩綱 一函
淮海集	六本	百戰經	二本	易知錄摘要 十二本
明板通鑑前編	十本	望溪集	十六本	壯悔堂集 六本
翰苑集	八本	皇極經世	十六本	大雲山房集 十本
臺灣圖說	一函	籌海圖	八本	杜詩鏡銓 一函
琴簫合譜	一函	唐宋文韻	十六本	平番奏議 四本
銀圓	兩湘平			
錢票	千文			
上白米	石			
次白米	石			
中米	石			
穀	石			
灰麪	百觔			
洋麪	包			

安化茶	勛	五十六文
淮鹽	勛	七兩三錢
茶油	百勛	七兩六錢
洋油	箱一箱	一兩九錢
牛油燭	勛	一百二十文
豬肉	勛	一百零八文
雞	勛	一百二十八文
鴨	勛	一百二十八文
鮮魚	勛	八十八文
塊煤	百勛加一磅	三十六文
烟煤	百勛	三十六文
柴煤	衡斗較省斗加二五	三百二十文
木炭	百勛	二十六文
湘報館申定章程		減一文

一現在各處掛號者將次竣事自二月二十八日起所有未經掛號之人可徑赴本報館掛號不取號費勿庸再向涂萃和處掛號

一凡涂萃和經手掛號之家有欠送之報業交涂萃和補送請各遣人往索

一本報定例於每月初一日先收報費錢一百三十文以後按日送報如欠送者請扣罰報費本館即扣罰送報人之應領薪資

一收費另給合同單一紙各執半張取費時對照印不符者可持赴本館審驗

一本館除業經掛號逐日送報外如有遠方躉販及近處零販之人向本館定報販售者可以酌減價資惟須先行繳費方能發報

湘報館啓

戒纏足說

浙江洪文治撰

女子纏足或云始自齊東昏侯之潘淑妃或謂始於南唐後主之宵娘我據史記邯鄲婦人躡利屣之語謂周末已有之楊用修求其說而不得乃偽造漢雜事秘辛高江村則直言莫知所始愚謂史記所云即漢書言彈絃跕躡乃躡無跟小履與後世弓鞋迥異東昏侯言所謂步步生蓮花亦借用報恩經鹿女步步生蓮花事皆可為纏足之證陶靖節閒情賦願在綵而為履附素足以周旋悲行止之有節空委棄於牀前其未加纏裹可知世傳馬鬼老嫗得楊妃錦襪長不盈三寸小說家言或由附會若溫飛卿錦襪賦蘭裏花春雲邊月新羅縵織女之束足纏婉嫺娥之結璘則明言束足矣六寸膚圓之句雖出依託要是五代人語然李後主詞刻襪步香階倒提金縷鞦韆能行知鐵骨猶未折也至宋劉改之沁園春詞窮形盡相與今世不殊蓋此風乃積漸而成事變且微史册不載故無由得其緣起大抵婦人形體率尚纖柔眉脣腰指罔弗以小為貴惟足亦然惡其長巨則束縛而摧折之萌於唐而熾於宋觀唐人言女樂皆歌舞並稱宋則言歌而罕及舞殆不能矣元明至今薄俗相沿習非勝是誠不解其何所取而為之以言乎美則毛嫱西施初非纖趾借曰美焉則是治容誨淫為人父母更不宜出此或有曲為解說者曰用是拘束其身毋俾亂步不知共姜伯姬誰加繫縛而流娼繩使遠涉江湖未見其能禁絕也周官婦學之法曰婦德婦言婦容婦工所謂婦容即足容重手容恭之類今行則吟踔立則跛倚婦容失矣纒而弗織婦工闕矣問安視膳因茲漸廢而婦德亡矣婦德亡家政荒大亂之道也一事之微其流弊乃至於此極可勿懼乎天地之運極則窮窮則變乃今志士仁人創立不纏足會於上海湖南福建接連議行物窮將變之幾乎會中章程周密簡易不須贅言獨念屬毛離裏之親顧復根於天性其恣行慘酷而不顧者蓋有不得已焉夫樂稱譽畏譏評而不問事理之是非庸人之情大都如此婦女之恥不若人則新婚為甚故世俗呼為鐵門限娶婦延賓名曰開房浮薄少年狂調虐謔無所不至幼時嘗聞有著假履之祈婦賓客竊取為笑婦遂闔戶自經近見新婦足形不直其姑束之以竹婦乃仰藥而死夫婚姻之禮為酒食以召鄉黨僚友所以厚其別也為禮而始於無別將何以宜家室而蕃子孫魏晉之間世以放誕相高此風乃起葛稚川嘗深詆之說見抱朴子外篇竊願章程中增此一禁婚家延客勿入青盧庶以塞禍源而端本始昨讀沈君廣議欲乞 詔旨申禁斯事猥瑣似難上讀 宸聰然亦有可言者婦人於其親女雖割慈忍愛加以戕賊猶存哀憫之心程功尚緩惟惡姑悍婦之於養媳婢女狠戾殘毒往往出乎恒情之外近有村婦為九歲養媳纏足惡其啼號立時毆殺者乃因名分已